

TARIKH	13 / 9 / 2012	SEKSYEN	Nasional
MUKA SURAT	36	RUANGAN	Setempat

'Guna saluran betul'

Tindakan guna visa umrah tunaikan haji di Makkah cemar nama baik, reputasi jemaah Malaysia

Hayati Ibrahim

PUTRAJAYA: "Dalam soal beribadat kita perlu lebih bersuci hati, ikhlas dan mengikut peraturan yang sudah ditetapkan pihak berkuasa Arab Saudi, laupun niatnya baik iaitu mengerjakan haji, tetapi peraturan juga untuk kebaikan," kata Menteri di Jabatan Perdana Menteri, Datuk Seri Jamil Khir Baharom.

Beliau mengulas tindakan sekumpulan jemaah Malaysia yang menggunakan visa umrah untuk tinggal lebih masa bagi mengerjakan haji dan mengikuti kelas pengajian di Makkah.

Katanya, tindakan itu boleh mencemarkan nama baik dan reputasi jemaah Malaysia yang dianggap sebagai individu amat berdisiplin, tertib dan mematuhi segala peraturan ditetapkan Arab Saudi setiap kali musim haji.

"Bukan hanya dari sudut peraturan, tetapi undang-undang kedua-dua negara juga

tidak dapat menerima (tindakan itu) kerana visa dikeluarkan untuk melakukan umrah semata-mata, tetapi dia menggunakan kesempatan untuk menyalah guna visa berkenaan.

"Jadi, bagi saya dalam konteks untuk melakukan ibadat kepada Allah, jangan melanggar batas peraturan yang ditetapkan Arab Saudi, visa umrah untuk umrah dan visa haji untuk haji," katanya ketika ditemui pemberita selepas mengadakan pertemuan singkat dengan tokoh ulama salafi, Sheikh Abdullah Al-Jalaly dan Mufti Masjidil Haram, Sheikh Suleiman As-Salumi di pejabatnya di sini, semalam.

Dalam laporan, semalam, sekumpulan jemaah Malaysia dikesan menggunakan visa umrah untuk tinggal lebih masa bagi mengerjakan haji dan mengikuti kelas pengajian di Makkah.

Mereka dikatakan berbuat demikian apabila hanya 50 daripada 300 jemaah ke Tanah Suci dengan visa umrah melalui sebuah agensi pelancongan pulang ke tanah air mengikut jadual penerbangan seperti ditetapkan, baru-baru ini manakala yang lain tinggal lebih masa, malah ada 'hilang' bersama pasport masing-masing.

Berikutan itu, agensi berkenaan, Destinasia Travels Sdn Bhd mendapatkan bantuan pihak berkuasa Arab Saudi untuk mengesan jemaah terbabit yang berusia antara 12 hingga 70 tahun, semuanya dari Kelantan.

Jamil Khir berkata, perkara itu tidak mempunyai kaitan dengan Tabung Haji kerana visa umrah biasanya dikeluarkan agensi pelancongan tertentu.

"Tabung Haji hanya mengeluarkan visa mengerjakan haji. Jadi, saya nasihatkan jika

mahu mengerjakan ibadat haji guna saluran betul, jangan gunakan jalan singkat yang boleh memudaratkan diri sendiri dan juga orang lain," katanya.

Mengenai pertemuan dengan tokoh ulama dan mufti Masjidil Haram itu, beliau berkata, hubungan baik di antara Malaysia dan Arab Saudi sentiasa terjalin dan ia dibuktikan dengan lawatan balas dua ulama besar terbabit bertemu Perdana Menteri, Datuk Seri Najib Tun Razak, kelmarin.

"Kita akan memanfaatkan lawatan ini untuk mengadakan perbincangan bagi menambahkan dan persiapan sebelum jemaah haji Malaysia berangkat ke Tanah Suci.

"Mudah-mudahan kerajaan Arab Saudi sudi mempertimbangkan pertambahan kuota jemaah haji 10,000 lagi, tahun ini," katanya.



UKHUWAH...Jamil Khir (dua dari kanan) bersalaman dengan Sheikh Suleiman selepas mengadakan pertemuan singkat dengan tokoh ulama itu, semalam.